



# Chel mal desmentegon...

*El ga senpre fato girare el mondo, tegnù in calda la minestra de i sentimenti, stare in piè la casa, la fameja, la socetà, l'umanità. Eppure anca in Italia le done le fa manco fiò. Cossa xe cambià?*

L'inaugurazion de na vita nova, qua nel Veneto, la ciamemo "el mal desmentegon", parché la dona, la mama, dopo che la creatura xe nata, la desmèntega in pressia el male patio par métarla al mondo. Poco dopo, (oncò, on poco manco!) la xe disposta a ripètare el miracòlo.

Par fortuna – disemo – parché senò l'umanità la finiria in pressia e la Tera diventaria na giungla co qualche Tarzan e tante belve.

Eco parché el futuro de l'omo dipende da quello che 'l fa par la maternità e par la mama. La dona che diventa mama la dovaria èssare considerà on valore "inestimabile", on capitale da difèndare e conservare con cura. Inveze, spece oncò, vien sotovalutà el so valore. In nome del progresso, che ciamemo civile, el patrimonio de poder creare e consegnare al mondo la vita, no 'l xe 'bastanza capio.

Da quando che la nasse, ogni dona la xe on bòcolo, na gema, on buto de vita nova, senza distinzion de raza, de colore de la pèle, de cultura, profession o religion. E, quando che la diventa mama, la xe on fogo senpre inpizà, on mare de afeto e de amore, on granaro pien de ogni bendedìo, na sorgente de aqua calda, na finestra spalancà, na porta verta, on

rifugio sicuro, on altare dove posare el so sacrificio, on tabernàcolo co drento el dono de la vita. Gnente mai sarà pari al ruolo, a la mission che ga la dona e la mama nel grande mistero de l'esistenza.

Ma, in te na socetà come la nostra, purtroppo, no vedo tuta sta sensibilità ne i confronti de la maternità. La dona viene, pitosto, invità a no sentirse cussì tanto preziosa e unica, che in fondo, oncò



**Dopo el male patio da mama Mara par métarla al mondo, eco Caterina fotografà da papà Gianluca Gaburro.**

ghe xe poco de straordinario a métare al mondo on fiolo. Spece in Italia, dove ghe xe le percentuali pi basse de rischio de morte a causa de parto, anca se semo quei che rinuncia pi de tuti al "parto naturale", fasendo ricorso al tajo "cesareo", dove inveze, stando ai ultimi dati de l'*United Kingdom Confidential Enquiry*, el perìcolo de morte materna el xe 2,84 volte pi grande.

La globalizassion sa fare anca questo e tante done, in nome de

l'emancipassion e de la realizassion de i so diriti le s'è catà a pensare prima a la profession, a la carriera. Cussì, tante le selie de rinunciare a la maternità, rivando anca a interónpare el viajo verso la luce a na creatura che vien privà del so diritto de nàssare.

Quando se parla de mancanza de valori, forse ghe casca drento anca questo: la maternità no la ga pi l'importanza de na volta, anzi la

xe calcossa da evitare, parché la limita la libertà de la dona. E po' insoma, cossa xe-lo sto doverghe dare la teta... che dopo ghe toca rifarse el petorale! E 'lora pronto el late artificiale. Oncò na mama "moderna" no la ga gnanca pi da sforzarse a capire se el piccolo el pianze parché el ga fame, sòno o fredo: ghe xe on dispositivo che stabilisse la rason del pianto e te di-

se cossa fare, come se el piccolo el fusse on elettrodomestico che se inpiza e se smorza có se vole!

No sò fin a che punto se possa parlare de progresso: me sa che in tuto questo ghe xe na bona dose de egoismo. E la dona, la mama la xe vitima de sto egoismo. Forse bisogna tornare a trasmétarghe fiducia, sostegno, serenità e protezion, e inpegnarse a respetare de pi el valore de la maternità.